

En Daler Geld on Linnen in de Kaß

Von Peter R h i e m, Dinslaken

Wie „kleine Lüt“ döcker „grote Lüt“ belehren können on op wat van Manier, soll det Stöcksken zeigen. In Denslaken wohnden vör Johren denn Doktor D., en ganz bekennde Mann. Hei wor ok üt denn hiesigen Eck te Hus on doröm kahn hei ok völ Familien persönelch. Op jeder Gebiet wor de Mann beschlohn, et gov nex, kenn Frog, die hei nit hat klarleggen können. Als Familienvader wor hei ganz in Ordngong, ok sinn Diensmaiden wor hei en gujen Heer, äver ers wenn hei woß, dat sej ehrlech woren. So stelleden hei dann, wenn en neje Dern bej öm in Diens kom, ers mol en Prov op Ehrlechkeit an.

So kreg hei dann es en neje Husmaid, die garnit dornor ütsog, dat sej wat besönderes wor, äver hei hat se genohmen, weil sej so „astrant“ drinkeek on sowat mos hei hewwen, denn sin eigen Pöös woren in die Johren, wor sej all es en Klapp nödeg hadden. Nor ach Dag gefiel öm dat Wesen van die Därn all ganz gut. So woll nou noch den Doktor de Ehrlechkeitsprov ahnstellen, on wie die ütfiel, dornor kreg sej, die Dern, entweder et Vertrauen oder nit. So kom et dann, dat nor en guje 14 Dag die Dern bej et Oprümmen in de „Praxis“, so hotten dat Doktorkämerken, die Dern en paar Groschen Geld fohn. Sej nohm et op on broch et denn Doktor, indem sej sagg: „Herr Doktor, hier, gej hewt Geld verloren. Ek gäv et ou heimlech, dat ou Frau dat nit hört, sej sall ou nit ütschempen.“ — „Danke schön“, säht denn Doktor, „dou häs Rech, vertell de Frau et nit.“ Met en stell Lachen op beide Sijjen gingen beide öhre Arbeit nor. Denn Doktor hat denn Düwel in sech on liet et in Tukonf nit sin on verlohrt överall Geld. Me glöp nit, wor die Dern ömmer Geld fohn: achter de olde Truh, wat en Ervstöck wor, dann log all es wat in de Köök achter et „Venüß“, sogar boven op denn Balken, wor et Stroh för et Perd oppgesöldert wor, fohn die Dern Geld. „Wor denn Doktor nit överall in Hus herömlöp“, doch sech die Dern, „die Lüt verlieren Geld on et düht öhr nit weh! Wenn onserenhen en Groschen verliert, dat ös all en Leed.“

Jeden Penning, denn sej fohn, gov sej treu af. Met denn Titt komen die Dern doch Twiewel on sej sagg sech: „Dat stemp nit! Denn Doktor ös schleckereg! Denn well mej wat!“ Wie sej dann noch es ehnmol Geld fohn, dor wor et üt met öhr gut Gemüt. Sej brengt öhren Fond denn Doktor on säht: „Herr Doktor, nou ös Schluß met et Geldverlieren! Sej wollt mej well verapen met dat völe Verlieren? Ek segg ou ehn Deel: Fehn ek noch mol watt, dann passiert wat! Ek segg ou nochmal, dann passiert wat! Sej sollt drahn denken!“ Denn Doktor säht nex on bekiek sech bloß, wie die Dern met en hochrot Gesech vör Aerger nor de Köök geht. Wie gesagg, denn Doktor hat den Düwel in sech. So liet hei et dann dropp ahnkommen, wat die Dern well maken woll. So lagg hei dann andern Morges en ganzen Daler onder denn Teppich in et Wohnstövken, wat genau över die „Praxis“ log on doch: Wat soll die Dern well anfangen? Die „Praxis“ wor en klein Stöndjen in Gang, dor hörden denn Dokter, wie boven över öm die Dern ant „Putzen on Fägen“ geng. Hei hörden, wie Stühl geröck wudden, dann hörden hei, wie denn Teppich opgenohmen wudden on jertz hörden hei, wie die Dern kräftig, ganz nor hiesige Art säht: „Sonne verdrähjde Kerl! Sonne Dokter Isenbart! Na, dat wor et letzte Mol! Eck sall öm helpen!“ Dann wödd et boven stell för en Ogenbleck on den Doktor war beruhigt. Mar lau! Jetz ging boven en Rummeln los, dat et son At hat. Boms, fiel wat op de Grond, on dann ging et los. Paaf, paaf, schlug boven

en Hamer op. Denn Patient, denn grad in de Praxis wor, lusterden ok nor boven. Denn Dokter kos sech nit anders helpen on sagg för sinnen Konden, hei mög sech en Ogenbleck gedölden, hei woll boven es norkieken. So störmten hei dann de Trepp herop nor de Wohnkamer. Dor sog hei dann nou, wat los wor. Die Dern hat de Fuß voll Nägel on satt ehnen an den andern om denn Daler, denn ap de Grond log, on nagelden den Daler faß.

„Dern, wat mäks dou?“ säht denn Doktor. Die Dern steht op on säht: „So, denn geht mej nit mehr loopen! Ek wor et satt met dat Geld verlieren!“ Denn Doktor steht en Tittlang stell, äs wenn hei Wotteln geschlohn hät, on säht denn vör de Dern: „So, Anneken, dou häs mej wat gelehrt Hal de Knipptang on mak denn Daler wer los. Segg de Schreiner Bescheed, dat denn et Parkett nej ütflucken düht. Dou kas denn Daler beholen, mentwegen koop dej Linnen in de Kaß för dinnen Traudagg. Ek versprak dej, kenn Geld mehr tu verlieren.“ Wie denn Dokter gegohn wor, lachten Anneken noch es hellolp, dat denn Doktor bekehrt wor on överlagg sech int Stellen, wat van groot Bahn Linnen sej sech verdinnt hat, denn dumoliger Titt gov et noch wat för et Geld, wor en Diensmaid noch 30 Daler et ganze Jahr an Lohn hat.

